

**I** FLETËUDHËZUES I PAKETIMIT:  
Informacion për pacientin

## DEXA – NEO

**Pomadë për sy – (0.05% + 0.5%) - 3.5 g**  
**Tretësirë me pika për sy – (0.1% + 0.5%) – 5 ml**  
**(Deksametazon natrium fosfat, Neomicin sulfat)**

**Lexojeni me kujdes këtë fletëudhëzues përpara se të filloni përdorimin e barit.**

- Ruajeni këtë fletëudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efektëve anësore keqësohet ose në qoftë se vëreni ndonjë efekt tjetër anësor që nuk përmendet në këtë fletëudhëzues, ju lutemi të njoftoni mjekun ose farmacistin tuaj.

**Në këtë fletëudhëzues:**

1. Çfarë është Dexa – Neo dhe përsë përdoret
2. Përpara se të përdorni Dexa – Neo
3. Si ta përdorni Dexa – Neo
4. Efekte anësore të mundshme
5. Si ta ruani Dexa – Neo
6. Informacion i mëtejshëm

### 1. ÇFARË ËSHTË DEXA – NEO DHE PËRSË PËRDORET

Dexa – Neo përmban si lëndë aktive deksametazon natrium fosfat dhe neomicin sulfat. Deksametazon natrium fosfati është një glukokortikoid sintetik, analog i glukokortikoidëve natyrorë me veti të fuqishme antiinflamatore dhe antialergjike. Neomicina është antibiotik me spektër të gjerë, me veprim baktericid ndaj mikroorganizmave gram pozitive dhe gram negative. Neomicin sulfati është antibiotik i grupit të aminoglikozidëve, veprues ndaj agjentëve patogjenë më të zakonshëm të syrit si Staphylococcus aureus, Escherichia coli, Haemophylus influenzae, speciet e Klebsiella/Enterobakter dhe speciet e tipit Neisseria. Dexa - Neo përdoret në:

- gjendjet inflamatore në sy në të cilat nevojitet antiinflamator steroid dhe ekziston infeksioni bakterial shoqërues ose rezikuj për të;
- inflamacionet palpebrale dhe bulbare të konjunktivës, kornesë, segmentit anterior të globit të syrit, kur rezikuj i përdorimit të steroidëve është më i vogël dhe i pranueshëm në raport me përfitimin nga zvogëlimi i edemës dhe inflamacionit;
- uveelit kronike anteriore dhe dëmtimet korneale nga lëndët kimike, radiacionet, djegjet termike dhe penetrimi i trupave të huaj;
- gjendjet kur rezikuj për infeksione është i lartë.

### 2. PËRPARA SE TË PËRDORNI DEXA – NEO

**Mos përdorni Dexa – Neo në qoftë se:**

- jeni i ndjeshëm (alergjik) ndaj glukokortikoidëve, ku bën pjesë deksametazon natrium fosfati dhe aminoglikozidëve, ku bën pjesë neomicina ose ndaj ndonjërit prej përbërësve të tjerë të barit, pasi mund të shfaqen reaksione alergjike përfshirë anafilaksinë. Reaksionet alergjike nga aminoglikozidët nuk janë të zakonshme, por kur ndodhin, shpesh janë të kryqëzuara brenda grupit kimik;
- keni sëmundje të tjera virale të kornesë e konjunktivës, përfshirë herpes simplex;
- keni sëmundje mykotike;
- keni tuberkuloz okular;
- keni infeksione purulente të pamjekuara të syrit.

**Tregoni kujdes të veçantë me Dexa – Neo**

- Përdorimi i zgjatur i kortikosteroidëve mund të çojë në hipertension okular/glaukomë me dëmtime të nervit optik, defekte në mprehtësinë e shikimit dhe fushëpamjes dhe formim të kataraktit posterior subkapsular.
- Përdorimi i zgjatur i kortikosteroidëve mund të frenojë përgjigjen e organizmit dhe të rrisë rezikun për infeksione sekondare të syrit. Në ato sëmundje që

shoqërohen me hollim të kornesë dhe të sklerës, përdorimi i kortikosteroidëve lokalë mund të shkaktojë perforim. Në patologjitë purulente të syrit, kortikosteroidët mund të maskojnë ose të theksojnë infeksionin ekzistues.

- Nëse Dexa – Neo përdoret për 10 ditë ose më tepër, këshillohet majta e presionit intraokular.
- Dexa – Neo duhet përdorur me shumë kujdes në të sëmuret me hipertension okular dhe/ose glaukomë. Në këto raste presioni intraokular duhet të matet më shpesh.
- Përdorimi i kortikosteroidëve pas kirurgjisë së kataraktit mund të vonojë shërimin dhe të rrisë incidencën e blebit filtrues.
- Përdorimi oftalmik i kortikosteroidëve mund të zgjasë dhe të përkeqësojë gravitetin e shumë infeksioneve virale të syrit (përfshirë herpes simplex). Përdorimi i kortikosteroidëve në të sëmuret që kanë kaluar herpes simplex kërkon kujdes dhe kontroll periodik tek okulisti.
- Kortikosteroidet për mjekim lokal nuk duhen përdorur në infeksionet e padiagnostikuara të "syrit të kuq", sepse përdorimi i papërshtatshëm i tyre mund të përbëjë rezik për humbjen e shikimit.
- Mjekimi afatgjatë me neomicin sulfat duhet mënjatuar sepse mund të shkaktojë reaksione mbindjeshmërie në lëkurë dhe shfaqjen e mikroorganizmave rezistentë. Në infeksionet e rënda, mjekimi lokal duhet plotësuar me mjekim të përshtatshëm sistematik.
- Përdorimi i kortikosteroidëve oftalmikë tek pacientët që mbajnë lente kontakti mund të rrisë mundësinë për infeksione të syrit.

**Marrja e barnave të tjera:**

Ju lutemi të kontaktoni me mjekun ose farmacistin tuaj në qoftë se jeni duke marrë / përdorur ose keni marrë / përdorur kohët e fundit barna të tjera, përfshirë ato të marra pa recetë.

Është veçanërisht e rëndësishme që mjeku juaj të jetë në dijeni të faktit që ju jeni trajtuar me:

- barna antimuskarinikë, sepse kombinimi i tyre me kortikosteroidët oftalmikë rrit mundësinë e shfaqjes së glaukomës;
- barna të tjera që trajtojnë glaukominë, pasi kortikosteroidët kanë tendencë të rrisin presionin intraokular dhe për këtë arsye mund të pakësojnë efikasitetin e këtyre barnave.

Neomicina rrit rezikun për nefrotoksicitet kur jepet me ciklosporin, citotoksikë dhe antibakteriale të tjerë, si dhe rezikun për ototoksicitet kur jepet me antibakteriale (kapreomicin dhe vankomicin), citotoksikë, diuretikët e ansës etj.

**Shtatzënia dhe ushqimi me gjë**

Kërkoni këshillën e farmacistit ose të mjekut përpara se të merrni këtë bar. Gjatë shtatzënisë duhet të evitohet përdorimi i Dexa – Neo. (Kategoria C) Dexa – Neo mund të përdoret gjatë shtatzënisë dhe ushqimit me gjë vetëm në rastet kur përfitimti e tejkalon rezikun potencial ndaj të cilit ekzistojnë fetusi dhe fëmija, si dhe gjithmonë sipas këshillës së mjekut specialist.

**Drejtimi i automjetit dhe përdorimi i makinerive**

Si të gjitha barnat që aplikohen në sy, edhe Dexa – Neo mund të shkaktojë turbullim të përkohshëm të shikimit ose çrregullime të tjera të shikimit, të cilat mund të ndikojnë në aftësinë për të drejtuar automjetin ose përdorur makineri. Nëse ndodh turbullimi i shikimit, duhet të prisni deri në qartësimin e plotë të tij përpara se të drejtoni automjetin ose përdorni makineri.

**Informacion i rëndësishëm për disa nga përbërësit e Dexa - Neo**

Dexa - Neo – tretësirë me pika për sy përmban klorur benzalkoni i cili mund të shkaktojë iritim në sy. Shmangni kontaktin me lentet e buta të kontaktit. Hiqini lentet e kontaktit përpara aplikimit dhe prisni të paktën 15 minuta përpara se t'i rivendosni. Kloruri i benzalkonit njihet për çnqijrosjen e lenteve të buta të kontaktit.

Dexa – Neo – pomadë për sy përmban metilhidroksibenzoat (nipaginë), e cila mund të shkaktojë reaksione alergjike (ndoshta të vonuara).

### 3. SI TA PËRDORNI DEXA – NEO

Mjeku juaj do t'ju informojë për sasinë e Dexa – Neo që duhet të përdorni dhe kur ta përdorni atë. Është e rëndësishme që të ndiqni udhëzimet e mjekut tuaj me përpikmëri dhe nuk duhet të ndryshoni asnjëherë dozën vetë, sido që të ndiheni.

Pyeteni mjekun ose farmacistin tuaj në qoftë se nuk jeni i sigurt për dozën që duhet të përdorni dhe kur duhet ta përdorni atë.

Zgjatja e mjekimit është në varësi të dëmtimit dhe mund të jetë nga pak ditë deri në disa javë, duke u bazuar edhe në përgjigjen terapeutike.

Dexa – Neo – tretësirë me pika për sy aplikohet 1 – 2 pika në qeshkën konjunktivale të syrit, çdo 1 orë gjatë ditës dhe çdo 2 orë gjatë natës, si terapi fillestare. Kur merret një përgjigje pozitive reduktohet doza në 1 pikë çdo 4 orë. Me vonë reduktimi i dozës shkon në 1 pikë, 3 – 4 herë në ditë deri në qetësimin e simptomave.

Dexa – Neo – pomadë për sy aplikohet 3 – 4 herë në ditë, si terapi fillestare. Kur shenjat e sëmundjes qetësohen, doza reduktohet në 2 herë në ditë dhe më vonë vazhdohet 1 herë në ditë për të kontrolluar simptomat.

Nuk duhen dhënë më shumë se 3 tubeta pomadë për sy ose 4 flakone pika për sy pa kaluar një kontroll të imtësishtë të pacientit nga mjeku specialist. Fillimi i mjekimit dhe ripërsëritja e tij duhet të bëhet vetëm pas një ekzaminimi të kujdesshëm të pacientit nga mjeku specialist nëpërmjet kontrollit me biomikroskop etj. Nëse mjekimi zgjat mbi 10 ditë duhet kontrolluar presioni intraokular.

Mënyra e administrimit të Dexa – Neo është:

- Lajini mirë duart.
- Maja e tubelit ose e pikatores të mos bjerë në kontakt me qepikët, konjunktivën, lëkurën, gishtërinjtë ose sipërfaqe të tjera.
- Përdorimi i të njëjtit tubet/flakon në më shumë se një pacient mund të bëhet shkak për të shpërndarë infeksionin.
- Shikoni lart.
- Ulini kapakun e poshtëm të syrit për të krijuar një ulluk.
- Vendoseni pikatoren / majën e tubelit sa më afër ullukut, por pa e prekur atë.
- Hidhni sasinë e duhur të pikave / pomadës në ulluk.
- Mbylleni syrin për rreth 2 minuta.
- Sasia e tepërt e tretësirës / pomadës që del mund të hiqet me një garzë sterile.
- Bari duhet të mbahet i mbyllur në kohën kur nuk përdoret, pasi kur nuk përdoret me kujdesin e duhur mund të kontaminohet dhe të shkaktojë infeksione të syrit që bëhen shkak për dëmtime serioze të syrit dhe të shikimit.
- Nëse gjatë mjekimit, skuqja, iritimi, edema ose dhimbja në sy vazhdon të persistojë ose të rëndohet, mjekimi duhet ndërprerë dhe pacienti duhet të konsultohet me mjekun specialist. Po ashtu, në rastet kur pacienti ka kryer ndërhyrje kirurgjikale në sy ose ka pësuar trauma, ai gjithashtu duhet të konsultohet menjëherë me mjekun okulist.
- Bari duhet të mbahet në vende që nuk arrihen nga fëmijët.
- Në fëmijët, gratë shtatzëna apo ato që ushqejnë fëmijët me gjë, Dexa – Neo mund të përdoret vetëm në rastet kur përfitimti e tejkalon rezikun potencial të mundshëm, si dhe trajtimi duhet të jetë afatshkurtër.

**Në qoftë se keni përdorur më shumë Dexa - Neo:**

Në qoftë se keni përdorur më shumë Dexa - Neo se sasia që duhet të përdornit, ose në qoftë se fëmijët e kanë përdorur gabimisht këtë bar, ju lutemi të kontaktoni mjekun tuaj, spitalin ose të telefononi urgjencën për të marrë një mendim për rezikun dhe këshilla për veprimet që duhet të ndërmerren. Rrallë ndodhin efekte anësore nga mbidozimi i Dexa – Neo.

**Në qoftë se keni harruar të përdorni Dexa – Neo:**

Në qoftë se harroni një dozë Dexa – Neo përdoreni atë sa më shpejt. Në qoftë se është pothuajse koha për dozën tjetër, përdoreni atë dhe kalojeni dozën e humbur. Mos përdorni dozë ekstra Dexa – Neo për të plotësuar dozën e humbur.

Në qoftë se keni pyetje të mëtejshme mbi përdorimin e këtij bari, pyesni mjekun ose farmacistin tuaj.

### 4. EFFEKTË ANËSORE TË MUNDSHME

Si të gjitha barnat e tjera, Dexa - Neo mund të shkaktojë efekte anësore, megjithëse jo çdokush i manifeston.

Pjesa më e madhe e efektëve anësore janë të lidhura me dozën dhe zhduken kur doza reduktohet ose trajtimi ndërpritet. Disa efekte anësore mund të

ndodhin në fillim të trajtimit dhe zhduken në mënyrë spontane me vazhdimin e mjekimit.

**Efektet anësore më të zakonshme të Dexa – Neo:**

- Mund të shkaktojë rritje të presionit intraokular, madhësia e të cilit varet nga doza e përdorur dhe kohëzgjatja e mjekimit. Ky efekt, si rregull, zhduket me ndërprerjen e mjekimit.
- Përdorimi okular i Dexa – Neo shkakton vonesë në shërimin e ulçeracioneve korneale dhe rrallë mund të shoqërohet me dëmtime të nervit optik, defekte në mprehtësinë e shikimit dhe fushëpamjes dhe me katarakt posterior subkapsular.
- Nga mjekimi lokal me neomicinë mund të shfaqen reaksione mbindjeshmërie, zakonisht të tipit të vonuar, të cilat mund të shkaktojnë iritim, djegie, kuarje dhe dermatit.
- Mjekimi me kortikosteroidë në ato sëmundje që shkaktojnë hollimin e kornesë dhe të sklerës, rrit rezikun për perforim.
- Infeksionet virale dhe mykotike mund të përkeqësohen nga steroidet.
- Flisni me mjekun ose farmacistin tuaj në qoftë se vëreni efekte të tjera që nuk përmenden më lart.

### 5. SI TA RUANI DEXA – NEO

Mbajeni larg fëmijëve.

Mos e përdorni Dexa – Neo pas datës së skadimit e cila është e shënuar në paketim.

Ruajeni në një vend të thatë e të freskët, në temperaturë nën 25°C.

Mos e ruani në ngriqje.

Ruajeni në paketimin original për ta mbrojtur nga drita dhe nga lagështia.

### 6. INFORMACION I MËTEJSHËM

**Çfarë përmban Dexa – Neo – tretësirë me pika për sy**  
Lëndët vepruese janë deksametazon natrium fosfat dhe neomicin sulfat. 1 ml tretësirë me pika për sy përmban 1.1 mg deksametazon natrium fosfat ekuivalent me 1 mg deksametazon fosfat (0.1%) dhe 5 mg neomicin sulfat (0.5%).

Përbërës të tjerë: klorur benzalkoni, klorur natriumi, boraks, acid klorhidrik dhe ujë i pastruar dhe i sterilizuar.

**Çfarë përmban Dexa – Neo – pomadë për sy**

Lëndët vepruese janë deksametazon natrium fosfat dhe neomicin sulfat. 1 g pomadë për sy përmban 0.55 mg deksametazon natrium fosfat ekuivalent me 0.5 mg deksametazon fosfat (0.05%) dhe 5 mg neomicin sulfat (0.5%).

Përbërës të tjerë: vazelinë, vaj vazelinë, metilhidroksibenzoat, alkol celitistearilik, lanolinë e hidrojenuar, makrogol 400 dhe ujë për injeksion.

**Përbajtja e paketimit**

**Dexa – Neo – Tretësirë me pika për sy:** kuti me një shishe plastike sterile me 5 ml.

**Dexa – Neo – Pomadë për sy:** kuti me një tub steril me 3.5 g

**Shpjegues i ikonave ilustruese në paketim:**



Këshillohuni me mjekun ose farmacistin tuaj.



Përbajtja.



Kujdes.



Krem



Pika për sy

**Mbajtësi i autorizimit për tregtim (MAT) dhe prodhuesi:**



**PROFARMA Sh.a.**  
Rruga "Myslym Keta"  
Tel./Fax: 00355 4 23 62 800  
Tiranë - Albania

**Ky fletëudhëzues u rishikua për herë të fundit në Tetor 2013.**